

# Kecekapan pemimpin, ahli-jadi tumpuan Umno — Anwar

SUNGAI SIPUT, Sabtu — Usaha positif meningkatkan daya kepimpinan dan kecekapan ahli-ahli Pergerakan Pemuda Umno dalam meneruskan perjuangan mereka akan menjadi tumpuan utama sekarang, kata Ketua Pergerakan Pemuda Umno Malaysia, Encik Anwar Ibrahim.

Katanya, peningkatan daya kepimpinan yang lebih matang dalam mengendalikan perjuangan parti di masa akan datang adalah faktor penting untuk memperkuatkan perpaduan parti.

Beliau yang juga Menteri Kebudayaan, Bella dan Sukan menegaskan, asas-asas kepimpinan perlu dipertingkatkan selaras dengan tanggungjawab Umno sebagai pendukung Kerajaan yang berjuang untuk kemajuan negara dan rakyat.

Beliau menyatakan demikian sewaktu berucap kepada 1,000 pemimpin Pemuda Umno seluruh negara, di Khemah Kerja Pergerakan Pemuda Umno Pulau Mentimun, dekat sini.

Dalam hubungan ini, Encik Anwar Ibrahim menganjurkan, setiap ahli Pergerakan Pemuda Umno memahami dasar perjuangan parti dan negara dan mengikuti keadaan politik semasa supaya mereka akan dapat menghadapi cabaran yang berlaku sekarang.

Lebih seribu pemimpin Pergerakan Pemuda Umno seluruh negara berhimpun di Khemah Kerja Pergerakan Pemuda Umno Malaysia di Kampung Pulau Mentimun, mulai petang semalam.

Khemah Kerja Pergerakan Pemuda Umno Malaysia itu adalah yang terbesar sejak Encik Anwar memegang teraju pimpinan Pergerakan Umno tahun 1981.

Kursus itu akan berakhir 14 November ini.